

瓊臺類稿卷之五十九

少保兼太子太保戶部尚書

武英殿

大學士贈太傅謚文莊丘濬仲深



墓誌銘

太子少保禮部尚書謚文安周公墓誌銘

蜀中自古多文學經術之士入國朝以來以政事顯者固多有之而以文學名世者殆不多見今餘百年始得一人焉既居顯位有文名而又深於經術曰太子少保禮部尚書謚文安周公諱洪謨字堯弼叙之長寧人也曾祖世祥本縣學訓導

祖本原河間縣學訓導考永隆長陽縣學訓導三世儒官而祖考俱贈禮部尚書祖妣俱贈夫人公生弱甚甫三日適有異人見之曰此兒質雖弱而神甚全異日當成遠器公長而短小精悍貌雖不揚而精神健固自幼有奇志一時蜀中士子專攻舉子業公獨有志古學年二十五領四川解首明年廷試第二人蜀進士及第自公始初授編脩景泰中陞左春坊左贊善仍兼舊職未幾陞侍講又明年南京翰林院缺署事考進公南京翰林院侍讀往署院事成化初召脩

英廟實錄仍舊本院侍讀通前任滿考進秩侍讀學士尋陞南京國子監祭酒丁內艱守制會北監缺祭酒吏部累舉數人者皆不愜

上意有旨留缺以待公公起復至乃以命公近世儒臣未有並主教兩京者有之始自公世以為榮再昇陞禮部右侍郎仍掌監事甫閱月卽補禮部缺又四年轉左踰半載適禮部尚書張文質以憂去進公本部尚書三年考滿得加贈二代俄有旨加太子少保

今上卽位公以年至乞休致章凡再上不允或有

言及公者遂命公致仕乘傳以行賜寶鈔為道費
公歸家居僅二年卒時弘治辛亥二月二十二日
也享年七十有二訃 聞遣官諭祭者四命有司
營塋事賜諡曰文安公配王氏咸寧教諭錡之女
累封至夫人子男二長汝端鄉貢士次汝靖邑庠
生女三人長適李鯤次劉武臣二人皆鄉貢士又
次適任琛孫男一志汝端等將以某年某月某日
塋公于某山之原公初入翰林以館閣無政事專
以討論考校為職一意古學 朝退卽入 中秘
檢所未見書以資見聞而又以為學必見于用

留心世務為編脩時卽上疏條陳十二事繼是歷
官兩京以至為學士凡有所見卽封章具聞前後
毋慮數十宣德正統以來館閣諸公上章疏未有
如公者其在南京太學承安成吳先生寬厚之
事多廢弛公振作之士氣為之一倡及北來掌
祭適有士子納馬入監例科貢士與之爭撥歷先
後屢行奏擾公處之各得其宜異論始息在禮部
者十有三年當承平之時 國家典禮時舉四夷
朝貢不絕 親王冠婚公王下嫁妃嬪喪祭之類
其儀注禮節皆公掌 禮成賞賚歲無虛月

皇上在東宮行徵聘禮自永樂以來無前比也公與內閣大臣參酌古今定制行之

憲宗祔廟

祖宗有當祧者會大臣議議雖衆出而主之者公也遂為定制先是大臣三品以上子孫得廢叙為太學生後當道者沮之其例遂格公曰

祖宗定制著諸司職掌廢叙大臣子孫一品至三品皆有官非止一太學生也吾幸為禮官吾之子先已得叙為監生而不為衆申明可乎同列或難之以為無所因公遂以職名自咨本部具疏以聞

請復舊制六部章奏舊無此比也時論以為難他如奏加孔子樂舞為八佾以珠飾璣象以復古制止月食不食為不當賀給烏思藏印信勘合以為入貢證據減日本人進奉刀劍價直其所建明如此類者多著為令公自列官館閣已屬意天下事然性方直且真率自任不設城府與人言竭盡裏底不復察觀其辭色人率以迂目之晚年建請意欲有所激發振拔遂為人所指目賴天子明聖察公樸忠置之不問觀其致仕臨行恩賜及身後卹典意可見矣公生于道學大明之

後世方以五經四書取士而上濂洛之說士子勦
成說為文辭以應主司於其微言疑義不復
致詰公繙閱之餘偶有所得輒為闡明剖析其間
卓然自得者於聖經賢傳亦有裨益積久得二百
四事粹以成帙名疑辨錄在禮部時以獻于朝
意欲綴於各經書本註下以梓行也公恒對人言
吾為此錄發經書之蘊正先儒之失破千載之惑
雖三公之尊黃閣之榮吾不與易也公為文章專
主乎理不尚辭華信筆所書文從理順而不為奇
詭鉤棘之語滔滔千百言不窘也其為人心地坦

夷待物不為猜阻人或有所詒之者亦不之疑外若
寬縱中有定見主執一定人雖喋喋言之不聽也
居家孝友事母太夫人先意承志得其歡心待弟
洪範曲盡友愛族屬貧者厚恤之或為之嫁娶公
少篤學非有急務手不釋卷所著疑辨錄外又有
南臯子集二十卷菁齋集五十卷初公西歸蜀時
西洛耿公好問為之代故事僚友必以文贈行公
以予知已必欲得予言耿公乃以見屬予既最公
平生志行之大者以為公贈又謂古人著述多在
晚年公宜及時成一家之言補先儒之缺垂後世

之訓以望于公蓋公專門尚書學恒不滿於蔡傳
屢舉以語予予嘗勸公著以為書公曰侯予休致
閑卽成之予曰人命脩短不可必事當為卽為必
侯閑恐無日也公卽毅然奮發歸語同僚宜與徐
公南昌謝公曰丘先生言最是侯新春卽下手也
既而以部事繁劇竟不得如志致事 命下喜曰
吾志遂矣舟還次南京時值盛夏川江不可上乃
寓新河樓居日具紙筆將畢夙志為風所射行至
荊州得病至家力疾草安中國禦四夷策凡十事
遣人齎以進大抵皆平素所嘗言及曾經進者也

少年疾少間謂所親曰吾習尚書蔡氏傳以之取
科第自幼讀之覺其有未滿意處恒欲訂證之而
無暇今幸得暇矣不及此時成之恐無及也乃草
定凡例若干條疾作投筆端坐而逝臨終遺囑必
得予文志其墓時予汝靖在京師示公未易箚前
所作寄予書予少公一歲方有目青在告痛謝絕
亦文者汝靖以治命來請不得已而勉書此以慰
吾老友于九泉銘曰

明興百年多文學士士專一經惟用作義雷同
勦說誰復致疑侃侃周公實惟經師剖析精微

摘抉踈漏死者復生亦不予咎學既宗經文必
根理矧居顯位不徒言已人皆迂公孰知所存
無待而興卓爾不羣山川歛神草木回色庸蜀
英靈歸茲玄宅

明故都察院左副都御史盛公墓誌銘

英廟復辟之初權臣之冒功者朋比為奸鑿空起
邊釁欲樹奇功以蓋其迹率師闖塞即還虜因乘
之而入十三道御史欲有言同事有洩之者彼先
入愬于

御史中有與被繫內臣張永同族者欲為之

率往以激

上怒即逮所誣御史下獄明日衆御史章始上

上御便殿召衆入盛氣待之擲章付御史誦之誦
至半

上曰止摘章中所條事折之令其分疏復諭之以
終誦

上意稍悟然重違權臣意姑從輕典凡列名者俱
調外任其一人錫山盛公也時掌河南道事出知
保定之東廉縣先是權臣啓邊釁其勢焰可畏人
無敢言者公首與同官涑水張公鵬謀謂事干軍

國某等官臺憲烏可畏禍不言張公以為然即入
謀之兵科都給事中王鉉約以章交上機事因之
而失時聯官者皆未知也亟召入永平周公賓倉
卒誦所上章音吐洪亮略無阻滯及對

上之言詞直理正天下聞而壯之而不知首啓其
謀者盛公也同日出補外者若干人其後惟盛公
年最高官最顯而能以令德終嗚呼天於忠直之
報固獨厚之邪公諱顥字時望常之無錫人正統
辛酉以尚書蔡氏傳得雋京闈在太學十年所交
皆海內知名士景泰辛未始登進士第首擢河南

道監察御史尋以老成掌道事時初經己巳之變
朝廷懲前政委靡之失稍開言路一時言事者毛
舉細故攻訐陰私以張直聲公獨顧大體惜人才
掩其疵疾不為己甚善類賴之嘗兩奉命出按治
按淮時值歲大歉發倉賑貧全活者甚衆按閩時
適當大比拔賢振滯是科得人為盛及是首謀摧
折巨奸直聲凜凜聞天下其知東廉也邑多顯宦
往往怙勢為不法聞公至相戒曰是嘗劾奏石總
兵者其人不可犯也公變搏擊以為撫循吏畏而
民安之未幾丁內艱去民留之不可俟其服闋相

率詣 闕乞公公得再任不復用刑法有爭訟者
諭之以理輒叩首聽受不復辯鄰邑聞之訟多年
不決者各來請判于公公折以片言各心服而去
時人有清如水明如鏡之謠邑介真保間四境之
民雖非所治亦聞風趨赴郊外有荒落地自然聚
以成市邑人因目為清官店既去任民築亭為立
去思碑請文士為作記至今存焉歲甲申擢守邵
憲以延平民狡而事繁請于 朝移公治之延平
與邵境聞公政聲有素莫不革心向化巡按御史

錄公兩郡政績請旌異于 朝進公一階封贈父

母及妻歲癸巳陞廣西叅政專督糧餉丙申陞雲
南右布政使丁丑艱服闋改陝西尋遷左時廣西
殘破之餘公委曲措注民夷賴以不擾陝西地臨

邊公在任日遷轉無虛月適歲多歉公調度有
方而餽餉不缺人為刑部右侍郎佐其長以明刑
恒舉歐陽公求主下得而 死無憾之語為察屬告
有深文巧詆者 刑用是平僅再閱歲調

公南京蓋當道 人言欲得公處者或以為
言公曰吾南 紅 南固其所也明年山東旱

饑盜賊將奪之。廷議建遣大臣巡撫。魚曰：無如盛時望者。改公都察院左副都御史，乘驛往。命至公，即日就道。甫下車，露禱于天，雨即大注。枯槁復蘇。公多方設法，凡前人救荒之政於今有益者，次第舉行。而又因時之宜，條數十策行下。所司民賴以濟，賑恤之餘，所儲尚百餘萬。又有餘力，以及於前代聖賢有功於濟魯者，為之建祠宇，以報祀之。公山東之政，大以公黜貪暴，表忠良，除苛政，以固民心為本。在山東八年，齊俗翕然以變。年七十，以老疾上章。帝命歸。公在任。

上以其情詞懇切，從之。馳驛歸至徐州，適所部有大獄，以公知其始末有旨，命鞠之。獄成後，歸公自家食時家事，一以付其弟頤。至是抵家，伯仲怡怡，友愛加篤。公家事一不問，頤為之構方塘書院，豐山鑿池，蒔花植竹，以為娛老之地。公時靜坐一室，焚香讀書，以自適。泊歿也，歲丁未以上。

皇太后徽號，恩進公一階。家居者六閱寒暑，以歲壬子正月二十六日卒。享年七十有五。計聞賜塋祭如例。卜以是年十月二十四日塋于惠山之原。弟頤命其子虞持狀來京師，求予銘。按狀盛氏

常州右族世多聞人曾大父諱茂之大父諱子實
父諱文珪俱以公貴贈都察院左副都御史祖妣
吳氏妣馬氏俱贈淑人公凡三娶殷氏贈淑人顧
贈恭人何封淑人子男二唐義官龍廕補國子生
女三王洛強朴吳玉其壻也孫男二欽釗女四魯
孫女一銘曰

公為循吏仁中有義公為憲臣義中有仁公撫
邦國變荒為熟公佐邦刑於死求生最其功業
所在烈烈曰鉅而艱摧折大奸因銘及之補史
遺

刑部右侍郎林公墓誌銘

成化十二年十二月丁丑刑部右侍郎林公卒于
位

皇上震悼命翰林院撰文禮部官諭祭工部營葬
事其諭祭之文有曰存心正大操履端方有守
有為賢聲日著士大夫凡與公厚者方以公不幸
不極其用而遽爾隕逝為憾及得諭祭之文莫
不感嘆稱誦咸以謂

皇言雖簡而公平生大槩盡見于此死且不朽矣
公卒時家無餘貲子保徽甫十一歲惟一僕在側

經理其喪事者邑人吏部黃郎中孔昭翰林謝侍
講鐸二公乃徧訪公之歷履行事於其僚友門生
故吏條具示予請序以銘焉公諱鶚字一鶚其上
世自閩之長溪徙台之黃巖近析邑之太平鄉為
縣故今為太平縣人曾大父諱養民號石林大父
諱從參俱不仕父諱純仕為湖口縣訓導母趙氏
生母程氏公登辛未進士第明年拜江西道監察
御史階承事郎三年考稱給 勅進階文林郎贈
父如已官封嫡母太孺人丁丑擢鎮江知府壬午
當道者以鎮江事簡而公才長於治劇請與蘇州

知府姚堂兩易其地 詔如其謀公在蘇州僅一
年超拜江西按察使又三年卽遷右布政使尋轉
左庚寅拜南京刑部右侍郎階嘉議大夫未幾丁
趙太孺人憂服除召為刑部右侍郎通前任滿考
錫 誥進階通議大夫贈祖及父皆刑部右侍郎
母趙加贈淑人生母程始封太淑人公始終歷六
官再守大郡貳刑曹於兩京出入中外率稱官守
其為御史時適 朝廷方重臺諫一時言事之臣
捃摭或過其實公獨持大體略細故有所不言言
必當其實與山陰沈性齊名而簡靜過之時舉以

總三法司奏案士論翕然推重嘗監京府試大臣
子有不預薦者意考試官故黜落之以沽強直名
誣其取士不公公邑人林挺適入試在中列疑公
有私逮挺考訊將中公以法及弔所試卷考驗皆
如格事遂得白

英廟復辟凡前日言事臣過訐者率左遷其官特
召大臣擢其得大體者知大郡公得鎮江 陛辭
召見諭以擢用之意賜食大官無給鈔為道里費
公感

上知遇至郡舉備補弊凡前政之廢弛者次第興

舉之未嘗一言暴前人非惟曰必如是乃是其調
蘇郡蘇俗喜夸詐好興作公一切鎮之以靜其所
建革必詳審至再然後施行蘇人以公有雅望責
旦夕效於是頗有後言久而見公所處置事一一
各有深意然後帖然大服鎮江漕河經孟瀆頗險
言者請鑿河自七里港引金山上流通丹陽以避
之巡撫都憲主其議公以其迂遠而多石且壞民
田廬墓甚多言於大臣請按京口開甘露壩故跡
因而浚之以通舟楫春夏以閘秋冬以壩則道里
近而功力省從其言果便至今人過者必指曰此

林太守之功也蘇學廟像歲久多剝落者或欲因
其舊而加以脩飾公奮然曰懇像非古哉

太祖於太學易以木主百年夷俗乃革彼未壞者
猶當毀之幸遇公公易以木主有何不可或以壞
聖賢像為疑公曰此泥土耳豈聖賢邪孔子生於
佛教未入中國之前烏識所謂泥像哉況古人席
地而坐政不如此也聞者莫不竦服廉憲江西一
時僚貳分巡各道者入異其見往往用已意出入
于法公一正之以律多所平反庶信民妄傳天神
夏尚書等遠近驚疑公榜諭之且戮其魁其恠

公又嘗以歲饑奏減恒賦十五萬石禁樂戶買良
家女為娼遏嶺南峒寇不使入境江西士大夫至
今稱良方面者必歸公焉在刑部三年罪無大小
必加研審其或未當必從容請于大司寇務得其
情合于法而後已故獄經公者咸稱無冤云公事
之暇輒危坐閱書史臨古帖作楷書夜分乃止五
鼓輒起率以為常聞人有異書必求之既得手自
校讎有未安者訪善本是正奉身儉薄甚簡言語
少嗜好待下過嚴而於交游不苟合事母程淑人
尤極其孝敬母性嚴終日侍立未嘗少假以辭色

有所不愜意則跪請移時雖終夜不敢離左右家事大小一以次為於手若公者豈古所謂篤行君子者歟卒時年五十有四配王氏初封孺人進淑人子男三員先公二年卒次即保薇次保為甫五歲官終歸其喪將以 年 月 日葬于某 之原銘曰

君子之守君子之道惟心之安匪時之好毅毅林公質直而峭不違以顏不從以貌為之在我曷計其效外崇其壙內深其窆曰今之人亶古之肖我撫所行節以其要銘其幽宮以貽厥紹

兵部左侍郎何公墓誌銘

弘治己酉十月十有九日兵部左侍郎何公卒于官

遣官諭祭命有司營葬事其子綱將奉柩歸葬于錢塘某山之原先期持事狀來乞予銘公甲戌進士也是科取士三百五十人選十八人者入翰林為庶吉士既而列官中外三十有六年于茲矣今白首 朝行僅七人而四人出翰林公其一也予辱在四人之列而年稍長於公為景厚凡公生平心事他人不得與聞者皆竭底裏以相告語故

於公孜孜為國之忠悄悄憂世之心知之尤悉也幸而後死銘為可辭邪公諱琮字文璧杭之仁和人也曾祖考伯川妣周祖考子淵妣孫考彥容永樂甲申進士以刑部郎中出知辰州府妣王祖及考皆贈通政使祖妣贈淑人妣初封孺人進太宜人贈淑人公自幼穎敏弱冠即有志於用世補府學生從師習春秋下筆霈然而必根於理咸庚午領鄉薦甲戌登進士第選讀書中秘預脩寰宇通志書成賜白金綵幣遂除禮科給事中遇事侃侃敢言凡百事上章奏當參駁者衆相視莫知所措辭公注以一二語輒中要領人無異言尤善敷奏每對仗彈劾音吐清亮

注意焉適滿刺加國請封以次當為正使所司以各聞

上顧左右曰茲面黃白而善敷奏者邪胡為遣之乃內批改他給事中同列官忌公者他日有彈文屬他給事中讀

上曰今日彈文胡不令何某讀之且傳旨今後必以命焉衆方知

上有意在公也嘗以學校士習所係上章請嚴學

政汰太學生之昏老者衆不樂遂於太學題名碑
毀公名肆為謗訕公持身端介掇拾無所得久乃
帖帖以服適通政缺員以善敷奏特陞右叅議成
化中轉左歲辛卯丁母憂服除陞左通政時猶家
居也特召起之公諳練事體且恪勤匪懈時昌黎
張允中為之長得公裨贊為多張既滿歷陞侍郎
尚書仍掌司事故公在任最久張遷理部事公始
得專任焉前此規矩廢弛甚積弊頗多公一泄之
以嚴不數月間法立弊除然亦以此得謗歲乙巳
陞兵部右侍郎時尚書缺公專部政遇事詳慎凡

有施行必問其屬曰舊比何如必按故典而折衷
之以時宜故事無留滯乖方者未幾轉左故尚書
余公士英今尚書馬公負圖相繼來為之長公皆
輔以誠心正道不立異而掠美二公亦推誠共事
無有間言

上卽位之二年公通前任歷三考當遷尚書兩京
無缺員特加正二品俸而仍其舊職僅閱月而卒
享年六十有二公稟性直諒而尤嫉惡見事有不
平者輒為之忿疾若在已然者甫弱冠而辰州府
君見棄辰州居官廉罷任家居不事生人產業素

無蓄積而公處之泰然太夫人寡居公事之曲盡
孝道先意承志未嘗拂其意處兄弟間有人所
難者居官清介一毫不妄取與門無雜賓立朝幾
四十年勤慎如一日尤留心世務事未至而預為
之遠圖恒切切以懷隱憂若在旦夕間然者於書
無所不讀而尤究心於易有事輒稽於卜而篤信
不疑不為無益之文公餘歸私宅縱步花徑間口
不絕吟詠詩成未嘗以示人手自錄有恒菴稿又
嘗以西湖為杭城之眉目昔人導之以資灌溉近
為居民占據以為田圃恐其久而愈湮塞也既言

之當道聞于朝而疏浚之又著西湖說以示後
人其於醫道殆有所得辨證處方出入意表專其
業者亦或推以為不及公素無疾卒之日晨興浣
櫛畢將趨朝覺頭岑岑然遂痰厥不起嗚呼痛
哉公配吳氏累封淑人生子一卽綱以廕補國子
生孫二景壽景福女四長聘鄭某未行卒次適張
一清許永年錢應祥銘曰

毅毅何公恒懷隱憂厥憂如何匪為身謀心之
憂美既幽且遠公今已矣知憂者鮮我原公心
寓之銘辭欲知公者尚稽于茲

太常寺卿兼翰林院侍讀學士吳先生墓誌
銘

成化十七年七月某日太常寺卿兼翰林院侍讀
學士致仕吳先生卒于安福縣之里第訃聞
上遣官諭祭有司營塋以某年某月某日塋于其
邑某山之原先生諱節字與儉世傳為唐史臣兢
之後統著貞觀政要者也先生以春秋學著名當
世先是廬陵之邦治春秋者在元雖有李廉氏然
其學不傳至先生始偕其邑人劉忠愍公球李侍
郎紹王博士原受春秋學于麻城鮑楚山楚山之

學出自三山林清源師友淵源遠有端緒忠愍在
翰林雖專以春秋名然猶未甚著也至先生入翰
林始大以是經授學徒一時及門之士皆海內英
儁禮部貢舉所得士春秋一經先生弟子居多其
高第者後多至大官為尚書侍郎都御史者前後
相望其餘為方面郡縣者尤多一時稱師道之盛
者以先生為首至于今天下稱春秋學者宗安福
云先生始以是經首江西鄉薦明年會試禮部居
第二入對大廷擢二甲進士選入翰林為庶吉
士久之擢任編脩九年陞侍講未幾陞南京國子

監祭酒先生繼慈谿陳公敬宗之後陳公以嚴毅為教待諸生如束濕然晚年益加峻學者往往有不堪者先生一切反之以寬其初也兩京士夫交口稱譽以為得體逮其後也士風不古不能不戾於規矩或者以咎先生先生曰書不云乎敬敷五教在寬禮所謂嚴師云者非師之自嚴上之人嚴敬之也訖不變事久論定識事體者多是先生先生在南雍滿三考例該陞用朝論以難其代加以從三品俸俾仍舊職

今上卽位議脩

英廟實錄時老成凋喪知典故者無幾衆謂一時儒臣惟先生最久且曾預脩

宣宗實錄舉凡發例非得諳練者不可於是奏請召先生乘傳赴闕至改太常少卿兼侍講學士充副總裁官書成進本寺卿兼學士如故尋丁母王夫人憂服闋赴京謝賜葬祭恩卽上章求休致

上察其誠允之家居者十有餘年謝絕世事娛情物外時或作為詩詞寫情狀物歌詠太平而已至是卒距其生洪武丁丑春秋八十有五先生以宣

德庚戌登第官翰林者二十年中間出教南雍者
十有三年晚復歸翰林始終以文學仕為儒臣幾
四十年凡兩預纂脩一為總裁再主兩京鄉試四
方之人雖遐方下邑莫不誦其程式文摹其名而
想見其為人其詩文碑版之作傳播天下皆和平
易直而略無奇詭生澁之語其為人如其為文天
性至孝母王夫人年九十餘康健如少壯者先生
官南北輒奉以隨侍享祿養者餘五十年歲時上
壽母子鬢髮皆皤然天下之人聞之莫不高先生
之孝而美老夫人之壽且榮也先生心地坦夷矢

出言未嘗文飾以已之誠直信人之皆誠直人
或以非理罔之不校也嗚呼先生已矣世道日淪
於薄求如先生者何可多耶若先生輩庶幾古之
遺直所謂有國之元氣老成之典刑先生已矣使
後先生生者不復見古人之直道而行者其所關
繫夫豈小哉曾祖諱定翁祖諱玄考諱凱祖考皆
以先生貴得贈官祖贈太常寺卿兼侍讀學士考
初贈編脩繼贈如祖官祖妣施氏繼劉氏俱贈淑
人妣王氏初封孺人進太淑人配易氏初贈淑人
繼李氏以子貴加贈恭人子二俱承春秋家學遠

登進士為御史今為知府高任通判女一人適邑
士李諤孫男八人冕某某某某冕以廕為
國子生潛始入翰林時先生已教南雍及來為總
裁官叨在纂脩之列嘗受命作竹坡記不腆之文
在所不棄冕來太學終業又手書近體詩見寄潛
受愛于先生多矣今知府君特以志墓之文見屬
銘其可辭乎銘曰

三代盛時人行直道任其天真庸常是蹈世降
氣瀟存者幾希萬有一焉世實賴之賴之伊何
存古典則庶幾今人見古遺直懿哉先生今之

古人我存古心謂人皆然官非不崇學非不深
求先生者當於其心先生已矣今也則亡銘以
闡微匪私而諛成化十七年

塚墓類彙卷之六十

少保兼太子太保戶部尚書 武英殿

大學士贈太傅謚文莊丘濬仲深

墓誌銘

明故推誠宣力翊運武臣特進光祿大夫柱

國壽寧侯贈太保追封昌國公謚莊肅張公

墓誌銘

弘治壬子秋八月十一日壽寧侯張公卒于位

皇上聞訃震悼不已輟視朝一日 命中貴治喪

事有司營葬具屢遣官諭祭特 勅加贈太保追

封昌國公謚莊肅乃以是歲 月 日寔于宛平
縣香山鄉翠微山之原其兆域蓋奉 詔新卜者
也先期治喪事司禮監太監李公榮御用監太監
秦公德以故事墓必有碑有誌聞于 朝公之冢
子鶴齡以學士李君東陽所述事狀屬予銘公之
墓按狀公諱巒字來瞻其先河南人也後徙山西
之徐溝又徙河間興濟故今為畿內人曾祖諱希
信隱德弗耀祖諱迪夔州府知事考諱綬鄉稱善
人俱贈壽寧侯曾祖妣王氏祖妣郝氏妣裴氏俱
贈壽寧侯夫人公生而穎秀天資開敏兒時應對

夙嘗有成人風七歲能言即知書事伯父縉以儒起
家教諭交城公借其侄兄岐親愛其家教前後為
邑庠生岐登進士第累官至都御史公思齊其兄
益加奮勵期以世科相繼然而累試輒負屈稱成
化壬寅不得已遂循例于大學然其決科之志弗
得弗已也歲丁未
今上皇帝在東宮

憲宗皇帝下詔中外選婚時

聖后生十七年矣遂應選為

皇太子妃特授公鴻臚寺卿明年

上登極冊立 中宮超拜公榮祿大夫中軍都督
府都督同知庚戌封推誠宣力武臣榮祿大夫柱
國壽寧伯歲祿千石贈三代事亥

皇太子生明年詔建

儲進封壽寧侯號加朔連二字階加特進光祿大
夫餘如故祿加二百石仍贈其三代賜誥券子孫
世襲公出自儒家一旦承先世積慶之餘篤生
聖后母儀天下誕育

儲君綿 宗社萬年之祚有功於 國家甚大是
以榮恩侈賜重臻疊降金衣玉食良田甲第錫予

駢蕃天下之人得於見聞者莫不讚嘆稱羨以為
當然公畧不改其儒素使者及門稽首拜嘉什藏
惟謹曰天下之寶當為天下珍愆吾家起儒畯一
旦幸托肺腑荷 恩非常非但當為 國家惜財
亦不可不為子孫惜福也寧藏於無用不敢用以
匪彝况吾世業詩書豈可侈然溷於富貴而忘吾
世守哉士夫聞其言咸服其有遠識方幸公列爵
武胄中資其清慎儉約以漸染乎勲戚之家使之
有所矜式不幸不及下壽居然不起嗚呼惜哉公
配金氏封壽寧侯夫人子二人長鶴齡聘 嘉善

大長公主女王氏次也齡尚幼予主教太學時公
衰然班列中恂恂雅飭予固已異之及詢而知其
為同年進士都憲來鳳之弟加以禮待既而同
朝遇諸途必遜讓引避一時儕類繞陟榮途而遽
忘所自者其存心厚薄何相去之遠也古所謂有
恒德者公其人哉我朝戚畹之家多出自武弁
惟孝恭章皇后及

聖后二氏出自儒家安國恭憲公年踰八十壽考
以終而公僅及四十有八脩短雖不同而其家慶
之隆迥而大之以上資國祚篤生

聖后首誕

儲君其有功於

宗社則一也是用不辭而為之銘非但為公也銘
曰

倚歎張公世有大德慶鍾于家迺而禪國月光
入懷並照于日篤生正淑齊體

宸極首誕元良綿祚萬億惟莊肅公端重謹飭奮
迹儒門連姻

帝室福祿自天匪求而得鐵券丹書籠中立筆上
公之封美謚之錫生榮死哀古今罕匹揆厥所

原善慶之積序而銘之勒于金石告太史氏紀
載方冊垂千萬年為威範式

明故工部左侍郎致仕杜公墓誌銘

成化丁未予友昌黎杜公年六十有九以工部左
侍郎致仕家居者八年弘治甲寅三月乙未卒于
家距其生永樂己亥得年七十有六予少公二歲
正統戊辰始識公于太學為同舍生同登進士第
同官于朝中間公出典外藩尋復入前後相與
幾四十年方公致位而去予固惄然若有所失矧
今永訣邪幸而後死志墓之文何其敢辭謹按

譔李君旻狀序而銘之序曰公諱譙字益之先世

中山人元季始徙昌黎曾祖彥文祖復祖考敏皆

邑之聞人而隱居不仕公既貴始封考為工部主

事加贈本部左侍郎妣王贈安人加淑人祖考妣

之贈如考妣所加公初舉進士適朝廷欲輯天

下郡志為一編東新進士分往諸藩服採摭事實

輟命往山東還授工部都水司主事專理徐呂

二洪甫三載以例代選改禮部主客司尋署員外

郎轉郎中以父憂解任服闋改儀制司用尚書姚

文敏公保薦超遷浙江右叅政六年陞右布政使

又明年轉左入為順天府尹未幾擢工部左侍郎
始終凡八轉官歷任三十有四年散官至二品致
仕後再奉 詔進階資善大夫公初筮仕即涖徐
呂二洪洪當運道中迅流五石齧齧如齒列盤渦
濫滾舟稍失制則人與貨俱沒公至相其地勢詢
其水患稍加平治舟賴以濟歲適歉山東淮北流
離飢餓之民叢集兩岸隨舟上下號呼乞食公設
法勸率得米為淖糜以食之全活甚衆改注主客
司時天下承平化外番夷及內地土人朝貢者雜
遯不絕公點視彼輸獻方物酌量我回賜綺帛必

稱其直遠人安之儀曹居四司之首一代禮儀典
則攸屬而燕王奏請求取無虛日公援例據理處
之咸當遇歲大比士偕計至者叅倍往往往往特
衆譁聞公約束之以禮舉循矩度京尹之任尤為
煩劇百需所出百責攸萃公處之裕如也既不拂
權倖又不厲下民衆稱其得體在浙藩十有三年其
施為建制多可為經久計者至今循行之天下每歲
上供絲段惟浙最多近比有造作不如常度者輒
坐其閱視之官之罪潘司分守官每當閱視輒推
巡以避罪責有積數年更數人者積久蒸滬多損

壞以致重造多費公初至閱視凡諸郡累年之積
次第閱訖即上進繼公者踵之自後官府閱進以
時民免破家佐工部時漕河淤塞糧運不繼衆議
舉公往往任脩浚之事公自通州循河流以抵淮揚
相地勢去淤塞導源泉脩埽壩漕河復通竣事復
命

上嘉之有文綺楮幣之賜先是尚書余公子俊築
榆林一帶邊牆已獲其利又請推其法於大同用
功已什六七矣或者訐其用度不貲而多有乾沒
且傳致其罪

上勅公偕科道官往覈其實瀕行有以危語恠公
謂

上意叵測公佐藩司嘗與余同寮宜以嫌辭公不
顧遂行至宣府不與余相見悉取前後案牘與凡
出納之籍坐公館與科道官一一檢閱召凡收支
領用者人人覆論之無不合又究其根由條分縷
析事核情顯余公之誣遂白 朝廷釋然公歸

陛見賜以楮幣議者謂公平生行事此舉大有關
係蓋以余公城邊鄉人有主之於內者所主之人
與其同事者不成故嗾人訐余非公卓有定見而

敢任其咎余公必不能保全云公性寬大深厚而其心仁慈惻怛人無貴賤皆為之盡禮雖欺罔謾一以誠報之尤樂道人之善人有過多為掩覆芘護甚相負背亦不忍傷其意平居怡然能自娛適待宗戚鄉里極恩厚與人交游始終無窮達之間其為政以忠厚仁恕為本所至有惠利於人在浙藩久浙之士民至今稱頌其德晚年家居以身為教卒之日闔郡之人無不嗟悼公娶楊氏有淑行累封淑人生子二長源萊州府知府次濬禮部司務女一適按察僉事楊祥少房子一漢以廕

子生孫男五相讓俱府學生祀

孫女一源

等將以卒之年九月丙午塋公于昌黎縣北門外衡山之陽從先兆也公天性孝愛跬步不忍離父母方為郡庠生即以家事付諸兄奉二親居郡城既入胄監亦奉以行其後之官呂梁及前後侍朝署未嘗一日不在親側及任浙藩俸益厚而親不待矣時兄弟已老乃迎于浙藩事之如所生南方多珍味每遇佳景對盛饌必惻然動思親之念若公者非但國之良臣其亦家之孝子也歟是宜登高科居顯官享高壽其卒也又得

朝廷諭祭命有司營墓事嗚呼夫豈無自而然哉
銘曰

惟古昌黎在今近甸百年以來鄉佐再見所見
伊何璞玉渾金今人之貌古人之心既靡好竒
亦弗立異德政仁聲隨其所至位亞六卿年踰
七旬今其已矣名立澤存官為之墓

帝諭以祭史銘其藏垂千萬祀

明故中順大夫都察院左僉都御史邢公墓

誌銘

都察院左僉都御史致仕邢公以成化十七年五

月甲午卒于其家有司以聞

皇上命禮部備牲儀翰林撰文遣官諭祭之其子
頊以予與公交莫逆求予文志其墓先是公無恙
時以書畀鄉人林徽抵予豫以銘文為託得書未
幾而公遽捐館舍公長予五歲予幸後死安敢負
公託耶乃攷淚序而銘之序曰公諱宥字克寬其
先由汴徙瓊之文昌其七世祖章煥仕元為縣尹
曾祖某祖世賢父文廣封文林郎監察御史母許
氏高安知縣虔祚之女贈孺人公以永樂丙申生
自幼聰敏稍長補邑庠弟子員甚有時名臨汀

曾先生蘭分教邑中於諸生中獨加器重同里漢
西林氏為邑中宦族異其不凡以女妻焉歲辛酉
領鄉薦戊辰登二甲進士第觀政刑部己巳擢四
川道監察御史明年改元景泰太監王振敗籍其
家有告其家人孫太安匿其財者公與錦衣衛官
于信者鞠之無實于必欲沒入之且曰不然禍
至公曰無其情而文致於法是我殺之也竟辯白
被誣者二十人又明年邊事方興儲峙不給是年
適當百司朝覲建議者請免來朝官被劾之罪
運通州見儲糧四十萬石實宣府命公督運公

置有方不盈月邊儲悉足是冬出巡福建先是巡
按御史許仕達與鎮守尚書薛希璉交惡事聞因
命公代仕達且覈其事公至一斷以公無所回互
時沙寇甫平或言巡平衛軍多其親黨欲以鎮東
衛互易之章下會議薛尚書力主之公獨曰山海
異習輕動或生他患卒得不動巡海官獲犯禁
海者十數人請于朝以梟首示衆而宥號之聲
震地公獨疑其非真盜請緩之未幾果得真為盜
者亂後增築永安等四城民力有不堪者公奏留
八郡之匠赴役工部者協助之城得以亟成甲戌

出按遼東時都御史寇深巡撫其地副將焦禮有克敵功寇上其功狀乃先於主將曹義事下覆之寇為曹私囑公不從遂與成隙戊寅巡按河南奏革舊驛由黃河出潁上以達南京者數十所民便之得代還京時寇入總內臺憾公在遼東時事多方擗撫之無所得及公秩滿需選銓曹適知縣甄鐸有故勸人命獄有言忠國公石亨納其賂縱之者命下勘之衆畏勢無敢往者寇以公奏名妻覈其實蓋欲假是以中傷公也公審覈允當訖莫能害之庚辰陞知台州府台俗健訟公治之一惟緣

情據理民自信服居台四年兩以巡按時事就逮台民爭持金帛出數百里外贖之公一無所受又有耆民數十人赴京告留然公竟坐是降職為晉江縣知縣任未三月會赦復職改知蘇州蘇之田賦申天下丁役雜辦視他郡蓋倍蓰焉而俗尚澆浮公治之一本情理不出奇不立奇惟省徭均賦節浮費以便民為主不期月政化孚洽歌頌之聲播聞遠近公性不樂華靡且厭浙西俗尚過侈凡百有為務從素簡神祠惟消潔其在祀典者廨宇惟脩葺其切於用者成化丙戌江南大水而蘇尤

甚公發官儲及勸富民得米八十餘萬石賑之然猶不繼飢民百十持券入富室借之不與即強奪公即帖示俾飢民指其閉糴者各赴官官為之借明日爭持狀赴府官為署券付鄉老俾同保借又得米八萬石又不繼乃會計軍餉一年之外餘二十萬石發以賑之同官有以事未

上聞難者公曰民命在須臾奏免而後給則無及矣專擅之罪吾自當之是歲稔活飢民殆四十萬口事聞加陞浙江左叅政仍掌郡事降勅褒獎是年秋再陞左僉都御史巡撫江南總理兵民財

賦并理嘉湖杭三府糧儲提督屯種公受命後汲汲於培植拯救採察咨詢於官吏則獎廉能黜貪儒於民則杜奸究抑豪右浚孟濱丹徒二河增築奔牛二牖以便運道又奏減歲課之重者凡十餘事戊子奉勅飭理兩浙鹽法己丑又勅考察文武官員凡軍民利病悉聽從宜處置庚寅秋議事來京上章乞致仕不允章再上始得請時年五十有五也家居者十有二年至是卒年六十有六公配林氏封孺人生子三長項林出次璋次理少房劉氏出女三馮洛雲霸陳繼宗其壻也孫一旦

項將以卒之明年 月 日葬公於邑中銅斗山之陽公稟性廉介於人少委曲言論之際是是非非不少假借性好讀書於詩文雖少作然所作有意趣不為無益之語字畫亦道美有法晚年家居時尊翁踰八袞公奉養備至友愛諸弟其田產多以讓之足跡未嘗至城市凡一切外務畧不介意假日杖藜徐行田園間自樂而已構草亭於所居之前顏之曰涓丘因自號涓丘道人云銘曰

極天南隅環海一區孰知其中有此鉅夫為邦司直凜其不訛明憲之典而不傷乎物為民師

帥不赫厥聲盡教之職而必遂其生出處以正進退惟禮君子之心大臣之體鄉邦是賴焯有其先幸我後死為銘其藏 成化十八年

明故中憲大夫都察院右僉都御史汪公墓

誌銘

都察院右僉都御史汪公奉 璽書巡行畿內及

東北一帶邊關乃成化庚子夏四月甲子得疾上章乞告 命未下而公逝矣是月癸酉日也

上聞訃悼駭特命有司營葬事遣官賜文諭祭其子某等將扶柩歸葬于六安某山以予公同年進

士也介其鄉人王主事恒持徐學士瓊所具事狀
來乞銘嗚呼歲甲戌予與公同登進士第是時聯
名者三百五十人二十七年之間物故者什四五
官登 朝著至卿佐者無幾人公其一也儕輩中
予與公尤厚意公必將遠到不造其極不止豈意
其止此邪非特為同年惜蓋為世道惜也乃拭淚
按其狀序而銘之公世家廬之六安其州人累世
仕宦者首數汪在 國初時其高祖某已為湖廣
德安同知其後曾祖景道繼為山東莘縣知縣惟
祖克敬不仕父洪歷仕德陽鹿邑麻城三縣教諭

追贈文林郎四川道監察御史加贈大理寺右寺
丞母張氏初封太孺人加封太宜人又以公請進
封太恭人公生而穎敏承家教習尚書蔡氏傳補
州庠生領正統丁卯京闈鄉薦會試春官兩得校
官皆辭不就三試始中甲科首擢四川道監察御
史出按雲南所至振紀綱舉凡要不察察以為明
會有 詔審獄公多所平反然亦未嘗惠奸比代
丁教諭公憂服闋改江西道出按浙江歲滿還掌
道事在道務持大體謹憲度一時聯官者多欲撥
拾臣僚短長公輒舉明道之言以為戒一時稱御

史得體者公與焉成化改元廣右徭寇軼廣東界而過之且侵湖南嶺北朝遣都御史韓公雍都督趙公輔統兵大征當道建遣御史隨軍糾察之衆議以為莫如汪御史可乃以命公韓趙二公乃文武大臣中之傑出者人少當其意雅敬公聞公言有及機事者輒用之往往皆中其要害或欲有所施行輒曰汪御史得無不可乎而遂為中止者亦或有焉凱旋論功行賞擢公大理寺右寺丞未幾遷左故事三年一清理軍職凡其從軍授職繼襲始末究其始而續書其後謂之貼黃制用兵部

卿佐掌其事而執筆則屬翰林文學之臣而以風憲大司監之時都憲缺員衆議謂大理亦掌法官因以屬公公刑繁撫實無有滲漏歲丙申以九年秩滿陞本寺右少卿明年改右僉都御史巡撫畿內及邊關邊關東起山海西至猪圈頭又起黃河口至西墓田峪其間如喜峯松亭古北口潮河川諸處皆要害之地公一一躬履其地脩城墻塞蹊隧除器械謹烽火几鄒公來學所創置者咸為起廢補罅邊人謂巡撫大臣自鄒公後有閔公宗原及公三人為得體二公尚嚴而公以寬裕處之尤

為邊人所樂會 朝廷有事于建州公所巡之境
乃大軍所必由之道公預為區畫大軍入境事得
其濟而軍民無擾者公之力也公盡心國事疲神
極力遂至勞悴自公涖邊城首尾幾四春秋烽火
幾息公卒未閱月而邊報遽至或者以少風力詆
公嗚呼公所為其效卓卓如此無風力者能之乎
公諱霖字潤夫生于永樂乙亥年三月二十二日
至是卒享年六十有二配某氏封孺人加封宜人
繼娶李氏生子男五人長睦州陰陽學訓術次曉
次曉俱補州庠弟子員次時次眼孫男八

女四人銘曰

展也汪公和厚易直事行所無弗隨弗激彼信
信者謂少風力盍觀所遭其來虩虩沃以漫流
焱焱自息時之達之乃順而適爰舉其尤他可
類測已既罔虧下乃大益嗚呼汪公允為世則
我節其要銘其基石詒後人觀請契以臆

前大理寺丞孫君墓誌銘

弘治元年五月己卯予友前大理寺丞孫君廷珍
卒于其家又明年始聞其訃嗟乎哉廷珍君少予
六歲乃先予死耶予聞君自謫所歸以功名負初

心壹意魏伯陽之術探端索緒將求以長生然而
卒亦死邪嗟乎哉廷珍進而學儒既不得於人退
而學仙又不得於天其命也邪噫命非人力所能
移亦非道術所能迨予於君見之矣君諱珂廷珍
其字也登之福山人曾祖志學祖彥斌皆不仕父
遇河南布政使母某氏君自幼侍布政公官京師
稍長隨之官徽州所至交其賢豪其所見聞日以
增益然自負甚大出言肆辯恒欲蓋其座人歲丁
卯以禮經領山東鄉薦辛未試禮部不中或勸之
卒業太學君曰人有恒言中科中進士作官作御

史吾非此寧老死不仕也甲戌再試果登進士第
擢廣西道監察御史兩按外藩先山西後浙江皆
適歲大比君監其試事宿弊頓革凡夙負文名者
咸無屈稱行部一尚威嚴凜然人不取犯所至伸
冤抑除姦豪其在山西除大峪杜文翥尤為奇偉
文翥武斷其邑中人號欄街虎集郡不逞以為羽
翼目為幫虎持有司短長而魚肉其善柔有觸之
者操兵刃弦弓矢肆其毒無敢誰何之者其邑令
嘗因徵租杖里正適病死諸虎舁屍寘令公座毆
令幾死令移文上司輒為所遏不得達君聞之怒

將以計禽之為彼所先覺走聽朝君被逮至京
歷數其惡以聞諸虎盡謫戍邊境而一邑民害以
除列邑聞風搖手相戒莫敢犯君兩從大將出師
紀功次先荆襄後建州皆著奇勳而在荆襄者尤
為人所稱道自昔軍功難於得實若勝而通賞之
則勇怯不分專以首虜為等第則戰方勝斬敵又
何暇持首歸報君豫製卓旗一每戰必躬莅陣後
於馬上持之使獲功者望旗來獻馘而與左右瞭
望必參校得實然後紀之權貴不得以勢取富豪
不得以賄進軍中咸謂自來紀功者所未有也君

前後所與共事者總戎則朱保國永趙武靖輔督
軍則白司馬圭李都憲秉皆信重君君有所建白
設置無不開納而一時平賊定亂之功君所以裨
益者居多初大軍追千斤劉至南漳保國適遣疾
衆議欲駐兵以待君奮然曰見賊不殺豈得為勇
卒乃同守土總兵金牌李巡撫王都憲儉分兵追
勦至上原坪軍夜至立營整已君乃至曰此地
在兵法名為天牢胡可立營險徙營君曰暮夜非徙
營之時萬一賊來乘之危道也宜速選精銳亟據
高阜方整兵未已賊果至我師有備遂擊走之自

是軍中有疑難事多以質之君千斤劉就擒凱還
總戎以下各陞一級而君止加一級俸衆為君不
平處之恬然其後有事于建州總戎者聞荆襄之
平君預有謀必欲得君紀功軍中有事輒以咨訪
衆言淆亂待其一言以決及其功成衆謂公必大
用僅得南京大理寺丞時南京科道橫甚御史所
訊囚至大理不敢平反習以為常君至據法平允
一毫無所假借會大理屬有張評事者箠屬吏不
服撫其非法事君送刑部鞠之御史乃劾君與張
俱調外任君出知潞州蒞任未久鄉人孫達者為

藩府教授干以事不以從構怨于巡按御史御史不
直之并訐御史與君俱謫戍宣府君在宣府會羅
織之風起有誣君與其同謫者有異謀將藉為功
以希進用 朝命中貴勘之事得白 特旨賜歸
田里君歸至鄉時布政公休致家居父子日夕相
聚處優游田舍間日與諸弟講明經旨考究古今
而其弟三人者俱以家學戴記領鄉薦而二人者
登進士第珪為給事中瑛中書舍人瓚積進士業
以待試一家父子兄弟俱登甲科海岱之間前此
未之有也君娶張氏子男四人榮槃槃某女二人

其壻也孫男三人君生于宣德丁未至是卒享年六十有二卜以卒之明年二月塋于本邑之張村從先兆也君自幼精敏無不通達聞人有異書百計求之必得而後已皆手自校讎而或為之註跋所積多至數百卷經史之外下至陰陽醫卜之書無所不有然皆詳考而精究之多有所得而於兵家尤所注意恒以謂才不兼文武不足以成大事幸而得為御史兩預戰功已微見其端緒矣使用之盡其才而人不中尼之究其所至必有大過人者然而命止於斯惜哉銘曰

吁嗟乎廷珍進之於亨途也乃屯其人也邪寘之於死地也反伸其天也邪吁嗟乎廷珍天邪人邪孰能測知其所以然銘以饒之於墓門于以質諸地下之寘寘漠有知其尚有味乎斯文

贈光祿寺少卿鄧公墓誌銘

括寇起犯廣信界信之永豐知縣鄧公率民丁拒之於其縣境高洲接戰十數衆寡不敵為賊所執罵不絕聲而死時正統戊辰 月也事聞 朝命贈公奉議大夫光祿寺少卿給布六十端米三十石後又用言猪 賜謚恭毅命有司祠于鄉郡及

所治公諱顥字伯昂韶之樂昌人也樂昌之鄧自漢以來為著姓累世通顯至公登劉儼榜進士第觀政戶部嘗奉命使湖湘勞軍士不受私餽時稱其廉事竣回授永豐知縣縣當閩浙之交時鄧為七反於閩葉宗留黷于浙江江西相扇不靖永豐尤切近之公至集丁壯備器械塞蹊徑據要害晝夜會僚吏父老講求所以為備禦之具者甚悉時亦有所擒獲賊自是相戒不敢犯縣境公於是脩政事課農桑理冤滯和流亡毀淫祠及奏減重稅又以其暇日進諸生以明經史習禮容用是民大和

洽境內清肅鄰境之民咸以不得公為歎爭赴上司告欲借公邑人父老亦恐公遂為他邑所奪也亦相率留焉江西布政使吳潤等三上章薦之不報最後為巡撫侍郎楊寧僉都御史張楷交章論薦為江西按察命未下而公死矣是時年若干公貌不踰中人而慷慨有志節屹然自立不肯詭隨於書無所不讀而不為枝葉浮華之習旁通星命術數之學所言亦或奇中臨事明決操守潔白其在永豐藩臬有所難處事雖非公所治亦以撥代理鄰藩聞其名亦或有所借委焉嘗莅事

建之浦城脫當沒入者三十餘家又覈慶州坑治
免銀課者若干兩其人皆報以重貲公悉固拒不
受其所為卓卓如此類者甚多噫有德而不及大
施有才而不克盡用使公得高位膺重任所行當
不止此惜哉雖然與公同時者後公十數年往往
致身通顯敷歷中外其間樹功業隆譽望者固多
有之然因之而播其惡于衆遺穢後世者亦或不
能無矣求如公無所愧死得其所流芳史冊廟食
百祀者蓋僅有者也以少為貴公之所得多矣曾
祖 祖 父 夫人 氏生子二人長曰瓊鄉貢

進士次日球孫男 人公死之日雷雨大作賊大
惧置公屍歸高洲巡檢司署中明日邑人始昇歸
棺殮于邑之城隍廟又幾月日瓊始護公喪歸以
年 月 日塋于樂昌之原銘曰
伊昔越產入古史謀匪賢則忠奸倭殆絕屹屹
鄧公以死衛民以死報君有光前聞廟食在人
列傳在史於乎公乎人孰不死

瓊臺類彙卷之六十終

瓊臺類彙卷之六十一

少保兼太子太保戶部尚書 武英殿
大學士贈太傅謚文莊丘濬仲深

墓誌銘

戶部郎中致仕陸公墓誌銘

公姓陸氏也體諱也元之字也吳中姓望首顧陸
公之遠胄出口唐宰相贄也陸氏世居常之晉陵
今籍于武進已雖併而仍其地也曾祖文富婿于
金生子朝宗出為舅氏後姓其氏而承其系也是
為公之祖考二公者皆躬德秉義潛德而弗仕也

公之考諱淵始仕而為南樂教諭改奉化卒而
誥贈奉政大夫戶部郎中以公貴也公生而粹清
開敏殊甚既長而所嗜好惟篤意於詩書衆咸知
其有志也嘗隨尊甫教奉化遇有新編奇文即手
自鈔錄窮晝夜之力以研究之不少息以肆也年
甫二十又一即以毛氏詩領京闈薦書時正統甲
子歲也明年合天下士試禮部居前列入對大
廷賜進士出身第其甲在二也觀政天官時冢
宰則西昌王公少宰則句曲曹公愛公敦謹而於
儕輩中待之獨異也嘗以進士奉使邊方總戎者

循常例有所覬覦却之至於再三置之而用
一時仕者咸以出入禁闥為榮而公獨求之南以
母氏在堂便於奉侍也掌銓者嘉公孝誠特百而
京吏部之餘其階六品驗封清吏司主事也
掌封爵 誥命及蔭叙然惟吏役為難公一以公
心處之因其 一能否而用之各當其劇易也曹
務簡而日多暇行以從事於文籍故其學識日進
而大有所造詩也既而丁外艱起復改主事戶部
監督在京草場不動聲色未旬浹而盡董累年之
宿弊也九載績最陞秩郎中涖官於南京之河南

清吏司所司者田土錢糧公清以律已勤以蒞事而吏弊以清大為官長所器也乃歲乙酉長子簡發解京闈明年進士及第第三人擢翰林編脩公喜曰吾家書香今有繼也即寄聲編脩俾復祖姓而陸氏千年之宗祊始復其舊而不迹其所自也公之弟曰怡曰愉皆登名鄉榜愉尋登甲科為刑部主事至是簡借官于朝公曰吾可以休矣乃幡然乞恩以求致也歸家之日日與鄉之耆彥飲宴歌咏以樂太平而凡官政得失私家短長畧不形於言議也公有至性事二親而能先意承志未

嘗有所違忤致政家居太夫人猶無恙昕夕奉養備至歲節及誕日率子姓稱觴上壽鄉人咸以為榮曰毘陵顯官雖多致仕而歸親猶康健者僅見于是也公姓好文而於五七言詩尤其所長語與意俱到體格渾成評者謂其殆將駸駸於漢魏也平生志尚古樸見世日趨於巧而間有不趨世好者又不恒其德故以恒拙自號而因以名其橐所以微示其意也公生永樂壬寅卒于成化癸亥卜千十二支一周天而又加以二紀也夫人徐氏先卒贈宜人繼蕭夫人封如徐氏公之配也男子

子四人長即簡由編脩陞侍講今為右春坊右諭
德次節郡庠生次範次壽公之嗣也女子子四人
長聘于陸次聘于邵其二人者尚幼穉也孫男舍
章其次某森露頭角皆將明經以繼其世引而勿
替也簡歸將以卒之年 月 日塋公於某
原以予於公有夙契求予以銘以為墓之誌也簡
予主京闈考時所取多士之魁也而公之弟怡亦
予會試所取士也予於公有一面之素而又於乃
弟若子有斯文之契此所以序而銘之不辭而用
以貽其來裔也銘曰

當世所重曰惟甲科間世再見已榮其多陸氏
一門登名者四圭組蟬聯父兄子弟揆厥所元
起家地官甫冠即仕未艾遽還才不盡施澤未
徧及留其有餘以還造物我我新阡藏魄于茲
刻銘玄室永矣其詒

明故南城兵馬副指揮樊公墓誌銘

南城兵馬副指揮樊公以成化戊戌八月甲辰以
疾卒于京師之邸第其子駙馬都尉凱請于 朝
將扶柩歸葬于彰德府安陽縣先期持其鄉人通
政司參議李君所述狀來請銘按狀謂公友孝著

于家庭惠義周于鄉族鄉邦之中殆不多見信斯
言也則公所以誕生貴子而受 朝廷之寵榮者
非幸也宜也是宜序而銘之序曰公諱昭字繼宗
節齋其別號也曾祖諱居仁仕元為萬戶祖諱德
亨代其任父諱敬仕 國初某官母王氏公生而
器質宏偉簡重寡默不事表暴性友孝事二親先
意承志務得其驩心父年八十有一以天年終公
時方弱冠哀毀骨立殯塋一以禮廬于墓側者三
年及母卒亦如之歲時祭薦致誠備物遇忌日輒
流涕終身以為常其孝於親有如此者公兄弟三

人伯兄文華補郡庠生公所以資給之者備至
以毫髮事經其心俾得以專志學業後果中壬子
鄉試歷官太原教授一意盡職無內顧之憂公與
弟文明同心協力綜理家務一錢尺帛不以入私
室戶役家用之費皆出於一同居共爨餘五十年
怡怡如也其友於兄弟有如此者族大以蕃若老
若幼若親若疎隨輩行而施之以禮不能自立者
扶助之俾不失所有志向善者掖勸之期于有成
內而宗族外而親姻暨凡與樊氏有葭葦之契者
莫不曲為之地豫為之所其惠于族姻有如此者

歲嘗大歉出粟數百斛貸其鄉人貧不能償者後
悉焚其券鄉人王昇者窘甚罄其田舍盡鬻于公
後見其不能自存嘆曰何至是耶破券以田宅歸
之有王耀者戍宣府其父母家居者徙近郭母亡
權厝于城東後其父仍復舊居亦亡公為之殯併
起其母柩合葬之次年耀歸卒公又為之塋焉其
他貧不能具塋公為之經理者甚衆其惠于鄉隣
有如此者公非但仗儀以惠人至於人之感公化
導以從善者亦多有之嘗有父子欲異爨者公聞
之曰大是異事即躬詣其家為陳人倫孝行其人

感悟卒為孝子他郡有流來者善治生以致饒裕
邑人有利其有者誣為盜執以詣公公察其誣且
論之曰汝今生計已透能無鄉土之思乎其人即
日歸其鄉公嘗被盜或執盜以詣公公佯語以已
無所失盜伏罪悉以所失還公公曰此迫於飢寒
不得已也知其恥而伏罪善心生矣陰令人止之
且諭其改過竟為善士其化於鄉人又有如此者
公配賈氏生子三人長章次徵季即駙馬都尉生
而穎秀異常選尚廣德公主女二人長遼閻肅次
遼李泰議子容孫男三人琦璉瑤公生於洪熙已

已至是卒春秋五十有四卜以卒之明年月
日祔塋于邑之大寒鎮祖塋公起自閭閻一旦以
子貴連姻 帝室畧不改其寒素嘗於宅東隙地
構一齋列畫書其中客來焚香淪茗談論移日視
一切紛華泊如也逮遺疾度不可起呼諸子至前
囑之曰人家兄弟所以分割戶門者多以各私其
妻子遂至漸漬日聞終成怨隙汝曹宜戒之又專
命凱曰吾家本布衣汝一且至此皆前人之餘澤
也切宜進德脩業以保富貴不可少有一毫恣肆
也言訖而卒嗚呼若公睹世豈多有哉不但如狀

所謂一鄉之僅見者也人有如是之善行雖無
之請者尚當表而出之以礪世勸俗况駙馬奉
上命來遊太學以公不朽之傳見託雖欲不序而
銘之得乎銘曰

相城之郊苑有封樹有 明鉅人樊公之墓其
人伊何厚德弘度 帝室之姻駙馬之父富不
自有貴不易僚仁浹周親義感行路上天報施
於子發之子之所享親之所為如九仞臺必有
其基基之所培匪朝夕期天道不爽視此銘詩
明故光祿寺寺丞徐君墓誌銘

故光祿寺丞徐君諱敏字有功延平將樂人也
始君無恙時予門下士俞振明每過予必談君之
美不容口大意謂君為人忠實溫雅與人交久而
益篤待人一以誠而不為城府崖岸其居官也恒
以愛人利物為心事求其適可苟不至於債事而
虧官必不忍剝削下人以希恩取悅以起聲譽蓋
君子人也予聞其言疑信相半信之者以振明非
妄譽人者而不能不以一世疑一人蓋以今世人
如此者不多見也既而聞諸人言其賢者如出一
口雖未必盡如振明言要不為刻薄詭激之行

吁君其君子人歟乃今成化甲辰之秋振明携其
孤晉纍然哀經叩予門拜曰此徐光祿子也光祿
不幸以是年五月二十三日卒于官慨其平生有
志於事功百不及一二施而沒恐其泯泯於斯世
也大有託游先生門下亦猶晉之從大有也敢干
一言以為光祿君不朽之託予也雖以文字為職
業而不喜為人銘恐犯諛墓之譏非甚不得已不
為也然聞振明屢言徐君之美熟矣雖未識其人
然以意推之蓋一篤厚君子也寧能不為君子而
靳一言哉君延平世家大父諱淳隱居不仕鄉人

稱南華高士父諱禧母曾氏以君貴贈父光祿寺
典簿母孺人君幼以民俊補邑庠弟子員以易經
領景泰丙子鄉薦得校官不就卒業太學屢試春
闈不得意成化辛卯擢光祿寺典簿明年丁內艱
又三年服闋復舊官成化庚子陞光祿寺丞在
任四年卒得年五十有五君天性至孝在父母側
未嘗有逆言忤色親喪一以禮處宗姻間禮節往
來不爽伯兄早喪撫二姪不啻所生憐貧恤賈尤
喜賓客客至傾倒無吝容其待下人尤極慈恕至
是卒凡與君交游及聯官者莫不咨嗟涕洟如有

所失下至僕從皆哭失聲娶張氏封孺人生子一
即晉女二長適同邑章克儉幼在室晉扶柩南歸
將以卒之 年 月 日葬于其邑之某原銘曰
文公有云將樂之人其性多急胡君資稟獨異
鄉邑心平不頗氣和可挹溫溫其恭德基是立
善人不幸良可於邑銘以表之用矯士習

贈大理寺右寺副鍾公墓誌銘

公諱福字天申姓鍾氏世居太平府當塗縣之薛
鎮市宣德癸丑閏八月八日以疾卒于家享年四
十有九卒之八日葬于所居里街南報鋪之原葬

後又二十四年為天順戊寅以子貴勅贈承務郎大理寺右寺副其配陳氏封太安人安人受封僅四年而卒歲辛巳十二月某日也享年七十有九以明年某月某日合葬于公之墓公狀貌魁梧脩髯美目語音洪亮見之者起敬然為人疑易寬舒與人交開心見誠無凝滯意而於取予之際尤所不苟幼喪父事季父如所生嘗以其命輸粟實邊得引鹽千畢事歸悉籍所得畀之不留絲毫私已平生所貸於人不受券其償否不復計歲恒具棺首以濟有喪之不能舉者力稍自給者雖求弗

與不得已與之必取直其於博濟之中而有所節制皆此類性尤剛正不可以利動里人有後魯二姓者交惡魯之子實病死誣後殺之訟于官逮公等數人為証眾利魯賂證成其獄公獨持不可力為伸理後事竟白鄉人至今稱焉公少時嘗一遠遊後不復出去所居五里許構屋數楹廼儒者教子弟日寓其間親督之時加考校諸子稍能言即隨事指教無非仁義忠孝之言而於季子城尤憐憫焉迨遘疾撫其頂曰吾平生清白無以遺汝惟方寸地耳汝曹宜力學以起家不然吾死不瞑目

矣陳安人與公同心一德凡公所為之事安人從
史之力居多及卒公諸子俱未成立安人躬紡績
務樹畜勤儉不懈以殖產業歲時典祀必親蠲潔
待賓客接宗姻曲盡禮節平居勸諭其子不絕口
切切以恪守先人之訓為言及子城登進士第官
大理屬推 恩及之安人畧不色喜人問其故曰
吾悲其父之不及見也數貽書以平恕為勉深刻
為戒城服其訓名實日孚於上下尋有寺正之陞
安人即於是月棄世矣嗚呼古所謂仁人長者公
蓋近之而安人實克相成其美俱可謂賢也已公

之曾祖朝奉祖應庚父彥鎮俱不仕母戴氏安人
之父聰六母楊氏子男三人伯瑛冲璿季即城也
女一人適于証孫男七人岳岳巒呂岱密密女一
人銘曰

仕不必已榮不必生子行父志沒身存名孰非
我能均為所有百年亦盡所貴不朽不朽之托
庶幾在茲匹德並裁其安其宜亦崇斯丘去家
伊邇銘示後人俾知所以

封中都留守司經歷房公墓誌銘

勅封承德郎中都留守司經歷房公年八十四天

順三年三月乙巳卒于家訃至京師其家子尚書戶部四川司郎中正循例乞終喪將歸以明年某月某日塋公於其邑高公之原求銘其墓予閱狀而三嘆焉嗚呼公生也際熙洽之朝不謂不得其時居魚鹽之鄉不謂不得其地不登仕版而享有名位不出閭里而克施惠愛不謂不遂其志年踰八十而視聽不衰不謂不得其壽凡是數者人冀其一而不可得公乃兼焉豈非全福也哉迹其所以致此者蓋由公資質淳厚宅心仁恕勤生務本不事浮靡以成其家敦禮尚義周卹貧賤以仁

其族解紛息爭不仍武斷之風以善其鄰擇術師克廣義方之訓以教其子能膺朝家之褒封

為郡邑之賓禮示鄉邦之表儀誠非偶然者矣公

諱銘字文微其先定陶人在宋時有游宦羊城之

東筦者因家焉曾大父季八評事大父某都巡父

匡母林配胡封安人先公五年卒子男七人正其

長以大學士擢中都留守司經歷推恩封公者也

今陞郎中次直次中次和次成次安次定女一適

關彰祖孫男十六人女十一人公平生行實載諸

行狀者備矣予母庸贅姑撮其大凡如此而并繫

以銘銘曰

福有立民鮮克全惟公全之匪人伊天天耶人耶曷以徵其然德以裕其後學以光其先有崇其阡松楸鬱芊體魄在焉高公之原

封刑部主事莊君墓誌銘

泉之晉江有厚德君子曰莊君添祐字景暘牛永樂己亥某月某日卒于成化乙未正月乙丑其長子恭時為刑部員外郎聞訃將奔喪介予友顧光祿廷瑞持其同邑趙員外狀丐予銘且曰先君子夙負用世志而不有祿位無以自見于時幸教某

有成蒙

朝典封官刑部主事階承德郎然亦每

地以試其所蘊也不幸已矣禮葬必有志以述其平生大槩敢以煩下執事某將歸卜以明年某月奉柩葬邑鸞歌里鷓鴣山之原用以刻諸貞石瘞諸玄堂庶幾昭先德於不忘先人有知亦將欣幸於地下矣予先世亦泉人於其請銘也不容以辭按莊故泉之世家在宋中葉有諱夏者官至少師泉人凡遇氏莊者必以少師後待之君家世裕於貲有以自足往往不樂仕進君之曾大父謙大父禹圭父允祥皆不仕至君生七丈夫子始慨然以

教子為事恭稍長即遣入郡庠為弟子員所以程督之者甚至用是登己丑進士第仕諸朝君卒賴以封云君資稟純篤所行多與理合其尤為鄉人所稱道者三世人於先業分折之際稍有偏厚必構不平之訟君於先人遺產悉以讓諸季一無所取世有塋其親者費有所弗鈞往往爭焉君啓親殯以安諸吉壤諸弟欲有所助力拒不受薄俗至或計日以養親君養母曾恭人以孝謹聞諸弟欲迎養則曰吾長子也母不可養於衆子家君之行事其善可錄者不止此此其彰彰者耳錄其大

而銘之庶幾其言足以貽遠乎君配陳氏子男一恭居長次從次明次聰次惠次睿次讓聰先君卒女長適何孔泰次尚幼孫男福銘曰

士有百行匪一能全多有可稱斯則為賢賢哉莊君鄉人之彥序而銘之以昭其善家有善人鄉成善俗夫人則然治古可復

封中書舍人周公墓誌銘

公諱溥字伯登其先汴人也宋南渡初有千六百者階將仕郎宦游雲間因家華亭之舊溪高祖真益不仕曾祖士寧仕元為千戶祖汝明遭元季亂

絕仕進意儲書萬卷開家塾延名儒以淑子弟生
子三人其仲彙號怡蓮娶京口姚氏是為公之
考妣怡蓮以父坐累徙戍瀋陽尋內徙京師名
雖隸尺籍而實未嘗即戎事公侍居烏怡蓮晚年
代歸公以布衣游鄉大夫間所至輒分庭抗禮公
亦忘人之勢而未嘗有所卑諂及以子庠貴得
勅封中書舍人階徵仕郎榮歸故鄉日與其鄉人
父老過從驩甚則又忘已之勢不以子貴清顯而
有所矜肆閑居無事洒掃一室左右列圖書衣冠
危坐焚香終日澹如也顏之曰樂間因以自號人

亦以是稱之天順癸未庠得告歸省公時年七十
矣與其配胡孺人偕老家居朝紳為雙壽詩以美
之庠既抵家公得詩喜甚每燕樂輒令子弟歌以
侑觴明年趣庠赴闕且謂庠曰吾二老幸康健
且有爾諸弟侍養爾其疾行尚勤慎以若恩母
我戀也庠別去僅五越月而公捐館舍矣時成化
乙酉五月二十三日也得年七十有二公幼而端
慎明敏徙西江羅宗禮授詩書蓋嘗有志用世既
而以家累乃遣子庠就順天府學補弟子員所以
督課之者甚至庠後果以異數擢中書舍人陞太

僕寺丞今為尚寶司卿云公生丈夫子三人長即
庠次序次雖孫男二人時敏時牧孫女五人庠將
以隸某月某日葬公于祖墳西五十步許從治命
也先事自述其行實來請銘銘曰
鬱鬱佳城去家伊邇生而遊焉歿而藏只既有
其德又有其子德立子承孰謂公死

封主事王公墓誌銘

公諱禮字致和宋名臣沂公之後先世自益都三
徙至懷柔今為懷柔人少負奇氣不肯碌碌居人
下有司以才舉將赴選適

大廟舉兵清內難求可使者或舉公乃命督運
開平永寧諸處比歸則城被圍矣遂偕有司城守
內難平錄其功授湖廣安陸縣典史首尾十有五
年陞鳳陽府照磨丁父憂解任起復為松江府知
事尋丁母憂服闋以年老謝事家居者十年天順
二年三月以子貴受勅封刑部陝西清吏司主
事階承德郎年七十有八以是年某月某日以疾
卒於京師里第以明年某月某日歸葬于懷柔
孝德里先塋之兆次初公之未生也公之父夢神
人授以筆墨俄而公生生即穎敏異常從外大

父揚明義先生受書指畫輒解不煩繩督稍長益
向學第為家務所簿弗克專攻然於書史皆能知
其大義凡三改官皆為幕僚雖拘於職任不克以
大有為然上司聞其能遇事之難集者輒不拘常
比以責於公公慶之一一合宜在安陸時奉藩檄
督湖湘十三郡丁夫往營太嶽大和山時疫氣大
作十七五六公所部者賴公賑救之獨得無恙又
嘗督別郡民造海舶於某所民有穴地得白金龍
骨者衆爭奪之往訴于公公立為剖決之莫夜或
持所得以謝公公立叱之使持去其在鳳陽在松

江所行之事往往稱是至今三郡父老或能言之
且其天性孝友於宗姻故舊尤篤恩義故卒之日
聞者無不嘆悼烏魯大父諱隆大父諱彬父諱補
義皆不仕昆仲七人公於次為第二配牛氏贈安
人繼張封如牛氏子一詔登甲戌進士第官如公
所封女四長贅吳銘次適羽林衛指揮張興次適
蔚州千戶祝清其季尚幼銘曰
士不逢時名位卑微後古則然公既有遭白首
下僚豈非其天在已則軋在于則發天意存焉
最公之迹銘之於石以壽其傳

故庠生金鼎墓誌銘

景泰壬申七月二十七日予妻金卒僅踰月而其弟鼎即繼亡嗚呼天之禍金氏何慘邪况外舅氏以六十之年平生止一子一女一月之間相繼淪沒其為傷悼可勝既邪金故姑蘇人曾大父諱某洪武中以工部尚書安置澄邁後始隸戎籍于海南衛左翼大父諱堅初置有田產父用和翁母耿氏滁陽人德暘之女鼎生三歲而喪母幼有至性循謹飭如處子然未嘗妄發一言補郡庠弟子員自師以下咸器重之凡與之交者皆得其懽心

性嗜書乃若聲色戲奕之事漠如也予初婚氏時鼎纔十餘歲予愛之如同氣而鼎亦視予以凡也嘗謂予曰鼎無兄弟平生止一姊惟兄是依故以兄呼予云明年予北行又三年來歸鼎時候予於海濱見斬然出頭角無復昔態不勝其喜自是與予同處者六閱月閉戶窮經無事未嘗輒出夜則宿火以讀書寢而復起者至于三四作為文章已自有可觀筆迹尚新嗚呼惜哉鼎與其姊最相友愛迨其臨終也別無他言惟囑予善視其弟而已及其父問之亦然豈意其骨骸寒而鼎亦隨去

耶嗚呼痛哉鼎字惟新生宣德甲寅四月十一
二日至是卒年十有二聘瓊山買桐吳昊第四女
庶弟鼎將以癸酉年某月某日葬于某山之原嗚
呼無復是妻亦無復是弟矣予不銘將誰銘銘曰
蘭在萌折玉在璞毀吁嗟乎吾妻之弟未可以
死而死

寶臺類彙

寶臺類彙卷之六十二

少保兼太子太保戶部尚書 武英殿
大學士贈太傅謚文莊丘濬仲深

墓誌銘

明故江西左布政使周公墓誌銘

成化己亥秋江西左布政使周公聞其母大夫入
喪解官襄事于安陽僅再閱月卒于其家時七月
二十六日也訃至京師其弟駙馬都尉喪親未久
又喪其兄不勝哀戚茹哀詣 國學謂予曰吾伯
兄不幸棄僕去夫顧其平生交游徧海內其最相

厚而又者先生也敢以志墓之文為累予自來京師即與公文今餘三十年矣予年少長於公豈意公遽先予而逝而俾予志其墓耶乃披淚序而銘之序曰公諱晟字德明安陽人也曾祖廷元隱居不仕妣吳氏祖澄封監察御史贈鴻臚寺卿妣楊氏封孺人贈恭人考顯鴻臚寺卿妣宋氏封恭人兄弟六人公居長曰昇義官曰昌沙河訓導曰冕鄉貢解元曰昱義官曰景即駙馬都尉也其家世父子兄弟之盛有如此者公生於宣德己酉九月始生之夕其祖夢有一儒生趨而揖之而公

生和曰是孫也其言即顯赫如成人九歲隨隱居公教河間從學四明適其生政授以南事委其持節即成編戶等事之章即有理趣歸鄉於今生書一歲即領河內鄉薦時年十九也甲戌舉進士授翰林院庶吉士官不訖奉業太學歲三年奉命巡撫廣西清吏司主事入府尋以部使者為屬其族異正正七年陞湖廣右參政歲辛丁為廣西參政改參山東致一未詳陞按察使山東丁酉布江西方伯之命

其平生出處履歷之詳有如此者其在太學時年
最幼雅有高志好交者皆天下賢豪尤與莆中嚴
宗源建陽丁元以厚于亦其所厚者一人也朝夕
相與講明道義終身有用天下之志及登進士第
觀政刑部時以善冠尚嚴毅屬官少當其意者還
以所分囚罪書承旨有所反異其所為獄辭往往
得事情合律意用是尤為所重其疏留公為本
部主事前後有兩示來本部者皆公所為亦未嘗出
法外以慈惠出室者亦多其心民事則
屬邑有不種之麥也

之利民間子女有貧過時而不婚娶者諭富戶安
有才等出財帛資之一時婚配殆盡公出自刑曹
於治獄尤其所長郡中積年寃滯公一一為之伸
理民有水清鏡平之謠及叅湖藩所至刺舉惟當
凡利民事不擇劇易視其力所及而為之改山東
其所施為畧如在湖藩時暨長憲臺發摘奸伏幾
無所容焉然亦嚴而不苛論者以為得憲體公生
江北一旦涖江西人謂其設施容有不宜於土俗
公為政舉合人情如素宦然者其施為大畧有如
此者公幼侍鴻臚公教河間繼而入太學鴻臚公

仁厚長者非禮勿履公得於家庭之訓為多事母
親極其孝愛在山東時嘗迎養于藩府未幾都尉
君迎歸京師及公長憲臺遣都尉君有持節冊
封之便道經齊境乃奉太夫人舟行至齊河公出
舟次迎之憲臺建怡萱亭以奉之左郎中時翊為
記其事一時縉紳傳誦公於諸弟極相友愛有習
經學者公暇輒為之講解指授而於都尉君又加
意每向人言吾此弟天性至孝而器識不凡他日
當遠到時猶未選尚也人服其先見居鴻臚公憂
既免喪都尉君以事使山西道過家兄弟六人者

共被寢於先塋瑞芝堂分韻賦詩集以成帙詳見
予所作序文其家居孝友有如此者嗚呼若公者
其人品家世德性才調世豈多有哉公生于歲己
酉至是卒年五十有一初配沈氏繼劉氏再繼劉
氏生子三曰嫡孫後劉夫人出也曰大孫曰與孫
側室李氏出也女二聘山東陳都指揮長子仲和
次聘張儀賓長子堃以卒之年某月 日柩楊村
祖塋之側銘曰

世治氣完吉德叅會漳河之濱爰有國士如金
之屬如玉之粹如棟之負衆椽如海之受百委

夫何位不底極壽僅踰及天乎盍留以禎斯世
有哉其封銘以表識彼德則昭我言無愧

明故四川按察司僉事高公墓誌銘

成化戊戌十二月五日奉政大夫四川按察司僉
事高公卒 都城東之里第公雲間人也先世以
間右起實京師因隸籍京邑少從錢學士原博學
春秋兼資于南城之丘給事嵩房檢討齡學有源
委而自得者居多甚為時輩所稱許歲庚午果以
是經領京闈鄉薦再試春官始登甲戌進士第觀
改吏部丁內艱服闋授南京刑部廣西清吏司主

事陞員外郎未幾擢浙江按察司僉事又以丁外
艱去任起復改四川奉二璽書專撫治建昌地方
年僅四十有六即致其事以歸家居僅四年至是
春秋五十卒嗚呼惜哉君天性孝友事其考先意
承志罔有違逆蚤喪所恃事繼母如所生屢諸弟
妹親屬咸有恩禮其在秋官一時聯官者多以善
傳致深窮竟為能公獨平心易氣求生於死求輕
於重或人謂其太寬公曰獨不聞虞書乎與其殺
不辜寧失不經其食浙憲行事亦多類此嘗平台
括二劇盜不動聲色而禍患潛銷人尤以是稱之

後奉勅撫治建昌慶四川西南之極邊西
連吐蕃南接滇池諸夷或叛或服尤為難治公撫
馭有方訖公去任遠近帖然安靖衆方望其大有
為而遽為訖所構謝事以歸竟至于不起豈非天
哉公之弟祿鄉貢進士祿卜以公卒之明年九月
某日葬于魏村杜羊華左之原先期以公友凌季
行所述事狀來乞銘公諱舉字汝賢曾大父某妣
某氏大父某妣某氏父某封刑部主事加封員外
郎母某氏贈安人加贈宜人配某氏初封與加封
皆如其母先公一年卒子一銘女一尚幼嗚呼自

予來京師即與公交及登進士第又為同年一時
朋儕凋落殆盡今公又棄予以去幸而後死銘墓
之文安敢辭哉乃序而銘之銘曰

墓必有銘紀其平生考公生平職典詳刑於罪
之死求其生於法之重求其輕以此遺其雲仍
百世尚其承承

明故台州府通判楊君墓誌銘

近世名臣首稱三楊學士而西昌石首二先生之
子孫多以蔭得之未有以科名進者惟建安楊文
敏公之子孫有登名進士科者焉曰仕偉景奇字

者公之冢嗣尚寶司少卿恭之仲子也歲乙未會
試第五人 廷試二甲第八人明年授兵部武選
司主事又明年以從子暉事坐累出為台州通判
道次衢之西安縣卒于舟中歲丁酉七月十一日
也嗚呼景奇生大臣家有池岐可以進身不屑就
甫知人事即慨然有志業經術期以紹述先人為
事聞安成劉伏和春秋有家傳即執經以從學歲
己卯領閩省鄉書試春官連得校官輒棄去之首
尾十有七年始得一第時予奉 命主試得其卷
讀之經學有源委五策皆出人意表奇之以實前

列及拆卷乃景奇也予顧謂同列曰文敏公有孫
矣未幾造屬夏官所掌者武臣銓選事事務叢委
景奇處之裕如大為大司馬所器重既而暉事起
震動京師衆皆為揚氏危景奇游學京師十餘年
事在鄉邑固不與也然猶波及之出官外郡衆謂
景奇暫出耳以景奇之行之學之才又為名臣後
出佐大郡必有美績不久當內遷而大用之豈意
其止此耶景奇生正統丁巳八月二十一日至是
卒年四十一配朱氏徽國十世孫子二人景勗女
五人皆幼景奇天性孝友於嗜義若嗜利然揚氏

貨產甲閩中群僎家居競殖產於所有益欲增而
拓之景奇獨客居京邸交游天下士學為古文辭
於一切貨利澹如嗚呼景奇於家為賢子弟於人
為賢士夫使天假之以數年之壽歷官三兩任其
所成立亦將為一時名臣不苟然也惜哉景奇卒
之又明年其後子昂以其鄉人雷主事仕旃所作
行狀來乞銘以年 月 日葬于 之原銘曰
烈烈文敏幸有此孫厥孫伊何亦敏而文有志
甚銳將復其門有替其容有偉其身既孝而友
亦儉以勤得不幸求交不苟親志大而遠思紹

前人胡車方駕遽折其轅天乎於人果孰踈親
賦以美資乃嗇其年吾無以充銘以問天

禮部郎中滕君墓誌銘

正統己巳秋奉議大夫尚書祠祭清吏司郎中滕
君危 駕北狩歿于王事又明年蒙 恩褒卹進
其階為奉政大夫贈其父如其官母黃為大宜人
封配劉為宜人又九年為天順庚辰劉宜人繼卒
時子弘以君死事恩補國子生需選京師痛念君
塋衣冠有日而墓隧之石尚虛今宜人又卒不於
此時求文以表識之又將奚待乃介其友韋子舟

持司業吳先生所述行實乞于銘按狀君諱員字尚默先世南陽鄧人隨宋南遷因居建為甌寧人曾大父緝大父通甫父子慶俱不仕君幼以開敏聞于鄉鄉之父老異之曰滕氏子年幼而質粹不凡子也年十一補郡庠弟子員庠之師儒竒之曰滕某質厚而性敏遠大器也未幾領鄉薦卒業太學聲譽焯焯日起同舍生咸心服之曰滕尚默量弘而識遠有用才也正統己未吏部考選居優等得廣之韶州府同知一時同選者咸謂君才與官宜無一人異言者是歲即之任值歲歉公私無積

貯以下無籍手地公至傾囊得白金若干兩告糴鄰郡命里耆籍民之窘甚者朝夕給之全活數千人郡治舊為淮王府主遷國之饒得請復為郡其規制侈大非人臣所宜居又吏胥公退無所於處往往雜就民居召截長縮大削雕還樸復為郡治如常式又度地為吏舍限其出入絕吏民交構之弊自昔郡吏惟取克數鮮有通文墨者動輒假手他人君痛革之凡上下文移具為成式以示吏俾其如或草創而為之潤色焉受其指畫者後皆通習所部地介江閩湖三藩之衝主戶少而客戶

多少拂其意輒相扇弗靖而翁源乳源二邑尤甚
君躬行巡省摺榜開諭許其占籍遂與編戶無異
凡郡之政君方一一與尊之即以丁內艱解任吏
民不忍君去至有垂泣者比聞君服闋當之京者
老數百人詣闕乞再任之朝議已除代者不
允君適至遂有祠部之除清白之操賢能之聲著
聞遠近在郎署踰三年即北行卒年五十有二孺
人諱淑萬中書舍人同邑劉賢之子在父母家二
十一年適君家三十五年而君故為未亡人又九
年卒年六十有五宜人事父母孝事舅姑如父母

不加敬為君助從其義不從其好持家甚有法度
奉上字下睦族善憐舉得其宜故君既沒與其存
無以異也子男二人長即弘次瑾女一人適同邑
雷文顯孫男五人女二人弘歸將以某年月日舉
孺人體魄合君之衣冠塋焉地名某山某原銘曰
生為王臣其生也榮死于王事其死也寧衣冠
之遺氣澤之似耐以其死是依是憑曷以昭之
刻志以銘

順慶府檢校許公墓誌銘

海陽有篤行君子曰西疇許公諱詰字一初西疇

其晚年所自號也年五十六始仕仕僅得順慶府
檢校在官十年即致其事以歸居十又五年春秋
七十有九卒于正寢時其子嘉謨以鄉貢進士由
舍法需選京師聞訃泣走求銘於予予交嘉謨父
又嘗拜公於南京新河之旅邸蓋知公者銘奚容
辭按狀許氏世爲朝郡望族曾大父某大父昆和
父閏三世不仕公生甫三歲而孤母張孺人教誨
備至遣入郡庠爲弟子員屢以尚書義試于鄉輒
不利後膺貢入太學有聲六館間增旨使荆湖
諸郡所至以廉謹聞人往往以大用期之事竣

歸省時張孺人年高公不忍離左右嘆曰古人首
言事君日長報親日短吾豈可急仕進而遠違勝
下乎家居侍養者踰十年始起試事戶曹既滿當
銓除偶以疾有所不利選曹次其等得官于蜀職
卑而道遠且險衆頗難之公畧無毫髮不平意忻
然就道既至官以家事處之上下皆得其心嘗假
令南充爲民除苛解繞數十年積弊一旦革去民
深德之而以不得公真令爲恨會朝廷有事于
百夷餼餉取給于蜀而運道艱甚他郡或至不支
郡委其責于公調度有方事賴以濟時藩憲重臣

督運者喜曰順慶好一檢校使諸郡皆得若此者
一人吾屬無憂矣歷任九年考最當遷官聞子嘉
謨領鄉薦遂上章乞致仕歸抵家深居簡出雖歲
時鄉飲酒有司禮請亦不往至是卒闔郡士夫聞
者咸哀悼之公凡再娶初同邑陳某女繼同邑李
某女俱有淑行婦德母儀為宗姻所重陳之卒於
永樂庚子六月二十三距其生歲洪武乙丑享年
三十有六李之卒於正統辛酉距其生歲洪武丁
丑享年四十有五子男七長嘉訓次即嘉謨陳出
加建嘉坦李出嘉慶嘉會嘉猷側室張氏出訓坦

先公卒女五其婿曰蔡良溫蔡顯吳悌李榮黃琦
孫男四女六曾孫一公孝友出於天性事母務順
適其意恒如有所不及與弟魯同居共食七十年
無片言相忤嫁孤妹必如母意宗姻中有患難極
力拯卹之不以有無為解尤樂道人之善有及人
惡者輒掩耳起避其立心制行往往與古人合蓋
天資然也嗚呼古所謂篤行君子者公非其人邪
公生以洪武壬戌四月二十日卒以天順庚辰十
月十八日塋以卒之明年某月某日其墓在東莆
西山之原先塋之側與陳氏李氏合塋焉銘曰

道孰不知鮮篤于信允矣許公資與道近靡蹈
其跡自明厥蘊有弗克施施弗克盡嗚呼天乎
故不我整我垂於文以詔厥胤

明故大理寺寺副致仕王公墓誌銘

廬江王公以大理寺副致政家居歲丙申年八十
朝紳賦詩祝其壽予爲之序又四年爲成化庚子
其子恒泣告予曰家君不幸以是年五月二十七
日棄世矣嗚呼痛哉予聞之慘然恒因以誌墓之
文見屬嗚呼公以歲壬午上章乞骸骨去歸其鄉
予嘗爲詩贈之旣而壽之以文曾未幾時今又銘

其墓人世幾何故人日盡後死者而銘先死者之
墓亦理之所必至也况又平生故舊哉乃叙而銘
之叙曰公諱敬字惟瞻祖諱某隱德弗仕考諱弼
以公貴贈大理寺左評事妣畢氏贈孺人世以藝
田爲業至公始以儒學發身南冠補邑庠弟子員
屢以書經應京闈試輒不偶尋爲有司勸駕膺貢
禮部與天下郡邑所貢士群試于 奉天門下翰
林考其文如式爲太學生時四明陳先生爲南廡
祭酒學規嚴甚諸生往往有不堪者公獨安然謂
衆曰師道不可不嚴禮當如是也公容止端莊陳

先生一見於衆人中即表異之諸生有不率教者輒謂之盍視王某乎一時聲譽翕然六館間歷政省部銓試居優等授大理寺左評事尋陞左寺副凡內外法司大小獄來讞者公盡心推究必盡人情合法意常誦虞書曰宥過無大刑無小罪疑惟輕切疑惟重與其殺不辜寧失不經評獄之要無出此數語矣獄有當公評者輒以是數語存諸心時亦往往以是語諸同列會承天門災朝集廷臣議肆赦公條上二事于其長其一謂律營兵外者以闕度論罪景泰初徵民壯入衛逃者輒遣戍

邊太重其一謂律毆殺正軍旣抵其人罪又以其家一人代伍今法司不分戲殺誤殺輒與毆殺同科非律意乞以二事載之詔條頒天下從之至今以爲比公在廷評中特爲寬恕未嘗曲法徇人亦未嘗法外入人罪爲寺副滿一考即上章乞休致時年六十五也家居足不履城市惟歲時闕稱賀鄉飲一至縣治日課子孫樹藝以自給優游鄉間二十年如一日也自是無疾而卒春秋八十有四初配英氏贈孺人繼配朱氏封孺人子男六人長懷先公卒次性次即恒由中書舍人陞太常寺

承今爲屯田主事次懷爲邑庠生次博次忭女四
人許禎趙寬徐瑄周銘其婿也孫男十四人瑋瑯
瓊璟某某某某某某曾孫男幾人性等
將以 年 月 日附塋于祖塋治父山之側恒
幼時以童子進楷書于朝讀書翰林公命從子學
爲古文辭故於公往還甚熟然則銘公墓者非予
其誰銘曰

仁哉王公司徒之平求生於死不死其生不能
以矜不察以明陰德孔多其後必興天道昭昭
尚驗茲銘

歸由里湏吾子來整行計也今朝議方大考察
京官旦夕計將決今與諸君叙鄉曲情況此一尊
鄉醒也不妨傾倒盡醉而散明日考察章下君在
留列甫謝恩退就第而舊疾作越七日卒于私
第君天性純篤而於天倫尤厚自幼隨侍文貞公
隨事指教中間南還侍親公屢還書激責之語多
嚴切蓋豫禁而厚望之有所懲而然也君服膺祖
訓自壯至老未嘗一日違雖英發開廓不逮前人
然循循雅飾跬步未嘗違禮犯分真保家子也與
太常同朝二十年比居隨行時時問安曰某早失

父賴叔訓迪今幸同仕敢忘愛敬及叔遷南京以
公務至必延居中堂如事父太常每每見其吟詠
以相慰勞君從弟曷司務子也仕爲上林苑監簿
君僦屋鄰居出入相友亦如君於太常君待人無
親疎皆一於厚族人子弟有以官至京者必館穀
之使遂成名間或悖去亦置然而厚遣之郡人有
氏楊者云出自忠襄亦必加禮不以疎遠見外西
昌人近世仕

京朝者唯君爲最久君推誠相處有難必赴有疾
必問送往迎來不厭其數卒之日家無餘貲聞其
訃者莫不哀焉君配陳氏翰林庶吉士孟潔孫女
少師胡文穆公外甥子男三人長即雲次霞次霄
孫男七人謙讓閤信論訓女四人雲霄奉君柩將
歸葬于某山之原介貢士蕭君昉奉庶吉士歐陽
君鵬狀來乞銘予與君相知有素故不辭序而銘
之銘曰

率祖以義率親以仁衍忠於祖足孝於親惟忠
惟孝邁迹自身銘以昭之百世有聞

進士程君文玉墓誌銘

自予官館閣教辟雍無慮三十餘年所接天下士

多矣固不敢厚誣天下之無人也然求士於程文之外能留心於酬世之文經世之務者固鮮矣况有餘力及於曆數之學神聖工巧之術者哉間得一二入耳出口道聽而途說之其中用力專而造詣深者僅得一人焉新安程玠也玠字文玉世居歙之槐塘宋理宗朝丞相元鳳之七世孫曾祖善得祖存新父永傑母方氏文玉自幼清介不與人苟合年二十二始補邑庠生聞祁門康用和以春秋授徒徒步往從之得其指教以歸時安鄉羅鑑掌邑教高簡自負諸生少當其意者獨於文玉厚

後羅與孫太守交惡諸生畏孫勢焰無一人敢相過者獨文玉周旋其間孫太守初惡文玉後以其義而重之累試京闈輒不利歲丁酉中第十一人主司刻所試經義于錄以程學者戊戌試禮部不中卒業太學辛丑試又不中甲辰始中第一百十二人廷試賜同進士出身觀政戶部奉部檄使江南便道還鄉拜其父既闋月卒于家時乙巳歲春正月十有一日也嗚呼文玉一生盡心極力於程試之文年五十又一始得一第意謂自此得以酬其素志矣不幸冠帶曾未踰年上有踰七望

八之老父竟不沾斗升之祿養而遽爾長往噫可憾也雖然此爲程氏一家記耳予所憾者則不在是焉夫自舉業大興百藝盡廢世之學者趨世以就功名本經四書之外雖子史亦鮮介意若夫所謂星曆醫技者疇人世業亦茫然罔有定見口雖云云而其心未必了了也又况程文之士哉文王自幼多奇疾留心軒岐之學方技之書自素難以下至於金元諸家無不研究固不敢盡非宋裴陳所集漢唐以來諸家而於近世張李數子所處之方亦必選而用之不拘拘然也折衷南北最得其

宜故其用藥療病多著奇効用是用知於名公鉅卿若太宰尹公少宰耿公少宗伯徐公三人者尤相厚者也然醫乃文王之一技耳文王於諸家術數無不精到而於星曆尤其所長人罕知之予知之獨深盖有所試者也予嘗即古曆法中奇文奧義人所未易知者以試文王文王一一剖析皆得其要又舉積數問焉文王布筭頃刻即得盖文王非但有得於古人作曆之意而於諸家筭法咸精而熟也嗚呼曆家之學自元郭守敬時至今餘二百年矣星官臺史惟秦成法循其故步幸其不至

大差失以道責然天時不齊終無久而不差之理
意者天祚國家必將生異人以了此一大事
庶其不至踰越多而界限遠晚得文玉獨於經學
之外肯用心曆數然念其親老而年幾於艾恐妨
其進取也方幸其免塲屋之累會

朝廷起用康公以禮部侍郎掌欽天監事意謂此
天然之機會可以成此志矣不意文玉之不幸哉
文玉館予家嘗與語近世醫書繁襍學者莫知所
適從命文玉以予意作一書名曰醫徑蓋以示則
於人俾世之深於醫者依此例以著書庶以便窮

鄉下邑之士幸而脫藁然亦未及收用竟也嗚呼惜
哉文玉娶方氏生子二長相次樞女一泚英遠江
祿孫男四玄端玄甫玄綬女一尚幼將以卒之年
月日塋于之原銘曰

程出忠壯為歛大姓槐塘一支最顯而盛蔚為
宗衮丞相吉公德盛流遠有孫亢宗學專而精
志篤而勵我自得之讀難書易嗚呼已矣莫遂
所期哭之而慟匪為其私

承德郎廣安州同知陳君墓誌銘

錫山陳君以廣安州同知致事家居年七十七以

疾卒于其家其子周以進士觀政某部將還守制
持其鄉人刑部盛侍郎狀來請誌其墓乃序而銘
之序曰君諱昱字景輝常之無錫人也曾祖某祖
某父公寔母某氏君少補邑庠弟子員以毛氏詩
應鄉試屢不利後膺歲貢起爲太學生初授浙之
永康知縣越三載以外艱解官起復改知閩之同
安秩滿陞貳蜀之廣安在郡者七年年僅六十三
陳情休致家居者七年至是卒成化辛丑冬十二
月丙寅日也君自在校時已有聲稱在儕輩中
獨淳謹儉素不事表暴累試不第同輩多怨主司

君獨處之怡然歲庚辰君以資次當貢禮部乃以
讓其同列畧無難色在太學恂恂雅飭未嘗犯學
規兩莅縣皆號稱難治在永康一以德化民不事
箠楚民德之至今同安丁寇攘之餘民多流徙君
乃白大吏緩征徭者刑罰瘡痍者復流徙者歸聲
譽大起廣安地荒僻而民頑犷君推所以治二邑
者治之時知州柴良以嚴爲治盜乘夜入公宇刺
之躡足過君門潛戒其徒曰慎勿驚我陳同知同
知乃吾所恃以生者盜既得以語州人聞者莫不
驚異晚年致政歸田結屋于邑郭之沈蘇橋環以

竹石顏之曰足菴暇日偕其鄉士夫歸老者馮少
叅錢大尹輩爲優老會日以詩酒爲樂於一切世
味泊如也君平居不妄言笑處事惟理是據不苟
同倍治家以嚴教子一於禮義卒之日鄉人聞之
多洒泣者曰鄉失老成矣君配顏氏先君卒子男
二長瑄納粟補官次周辛丑第二甲進士女四長
適曹昂次贅縲海次適鄧孚又次適郭天麟瑄凡
弟以君卒之明年葬君子之宅仁鄉沈蘇河北原
銘曰

德則有矣政則有矣名與壽則俱有矣銘以昭

之則死亦不朽矣

進士左君墓誌銘

吁江三谷左氏自宋元以來多顯宦

皇明以春秋舉進士第者三世矣予家食時已拜

叅政公瑞于廣藩暨官翰林又與給事中賢勲部

郎中贊同朝而於勲部君尤相厚歲乙未奉

命考試天下士預進士選者三百人而左悠者第

百五十一蓋叅政公之從孫勲部君之再從子也

旣廷對勲部偕悠來見講門生之禮予目其貌

儀觀清偉進退之際綽有禮度心甚奇之向者識

其文今則見其人榜中如此者蓋可僂數也曾幾
何時聞悠以疾卒于勲部君居第於乎惜哉悠字
尚遠別字敬菴承世業學春秋在邑庠時與張狀
元昇齊名領辛卯江西鄉薦明年試禮部得乙榜
不屑為校官辭歸益勵志問學寓僧寺讀書晝夜
不輟聲既中第觀政大理寺僅四閱月得疾纒數
日即知必不起與人言輒相訣別人意其德厚且
器識不凡當不止此多不之信則曰吾自知甚明
力疾舉酒以酌衆曰從今永訣矣有垂涕者則止
之曰何為此兒女態耶起正衣冠端坐含笑而逝

其年七月十一也得年才三十勲部君於悠為從
叔父悠臨終以後事相托且屬貽書慰其二親君
謂所以慰其親心而永其名者必得名人言以銘
其藏以予於悠為座主屬以銘按狀左氏世為南
城大族曾祖彥章以叅政公初任贈官監察御史
祖傑不仕父時良隱居為鄉人望母饒氏有泚德
兄弟五人次居四配黃氏子男三人長宏十二歲
次容八歲次京甫半歲女二人銘曰

孔有夫子頽無長壽從古則然於父奚咎嗟嗟
生兮弗享其成我予之銘悼死慰生

成化十

南靖知縣陳公墓誌銘

成化改元春正月之望常之無錫邑大夫循故事
舉行鄉飲酒禮致仕知縣陳公在賓位忽得風疾
昇歸在其家而卒自邑大夫以下莫不齎咨涕洟
曰善人已矣明日咸走吊其家公以邑庠弟子員
貢春官升太學未幾遷 朝廷有願仕遠方例公
奮然曰仕以行己志何擇地與官哉與其大得之
而遲孰若小得之而速也即列名上銓曹授貴州
新添衛知事秩滿陞知漳之南靖縣歷任二十年
即上章引年致仕家居者又五年至是卒春秋七

美公少好學有志節其在新添會

朝廷遣將再興麓川之後軍所過搔擾而蕃騎尤
甚衛當孔道日給負載馬數百匹守將給以官馬
不足咸走匿番騎因肆掠公獨毅然當之諭以禍
福且盡括城中馬如數給之衆帖然以定歲已已
苗獠叛圍新添幾一年城中食且盡人至相食公
隨方備禦遣諜偵知賊無統率以計誘之負米至
城下貿易公權宜以官銀二千兩易米以賑飢者
城賴以不陷其在南靖也當大盜之後公守學校
一切毀廢邑井蕭條田野荒穢公乘傳至首施及

父老詢民瘼更約束加意撫綏邑中百廢次第脩
舉悉復承平之舊為政先惠愛不事鞭朴漳民大
悅迨去官猶思慕之不已其家居時有道錫山者
必駐舟候謁然後去終其身公孝友天至事親能
養志仲兄子蚤孤撫之如已出與伯兄白首周旋
無異童孺時然平生誠篤簡默持守謹慎而自奉
極儉薄晚年益厭俗紛退營別墅於城東日以讀
誦課耕為樂因扁之曰耕讀且以自號云公諱七
名字孟聲父與祖母張氏兄弟三人公其季也娶
張氏子五人曰資曰質曰賓曰賢曰女三長適

竊文次適鄧琳次許顧呈言孫男二毅和賓舉甲
申進士第觀政大理寺授官有日而聞公訃援例
歸守制介其鄉人戶部員外郎楊君以狀來乞銘
將持歸刻石以某歲之某月某日墓于某山之原
銘曰

位不必顯而政有聲地不必華而道則行煩之
治也若易險之履也若平疇哉克斯頽水之英
銘以昭之百世其承成化元年

瓊臺類稿卷之六十二終